

海東逸史

海東逸史卷十三

翁洲老民撰

列傳十

張煌言字玄箸號蒼水鄞縣人刑部員外郎圭章子少時跌踢不羈常負博進錢醉臥社祠中夢神謂之曰君宜自愛他日成大事者君也由是感寤折節讀書崇禎十五年舉鄉試明年下第歸京師陷憤不欲生乙酉閏六月錢肅樂等舉兵移檄會諸鄉老煌言先至卽遣迎魯王於天台授行人至會稽賜進士出身加翰林院編

修改兵科給事中入典制誥出籌軍旅頗見其優紹興
破泛海入舟山道逢富平將軍張名振扈王入閩從之
既至招討使鄭成功以前頒詔之隙修寓公之敬於王
而不爲用煌言勸名振還石浦謀再舉加右僉都御史
自立一營曰平岡軍時黃斌卿守舟山名振以石浦之
軍與爲犄角明年春小腆紀年作丙戌四月監國紀同吳淞提督吳勝
兆請以所部來歸斌卿不欲往煌言勸名振應之遂監
其軍以行抵崇明大風舟覆煌言等皆被執乘閒脫歸
已諸將殺斌卿王至舟山煌言以所部入衛拜兵部右

侍郎辛卯八月紀年作九月 舟山破煌言與名振扈王

監國紀同

再入閩次廈門時滇中已封鄭成功爲延平王軍容甚盛不肯奉王煌言獨以名振之軍爲王衛時時激發諸藩使爲致貢然煌言極推成功之忠嘗曰招討始終爲唐眞純臣也成功聞之亦曰侍郎始終爲魯豈與吾異趣哉故成功與煌言所奉不同而其交甚睦癸巳春會名振之師入長江烽火逮金陵江南震動時上游故有宿約而失期不至左次崇明甲午再入長江故誠意伯劉孔昭以軍來會或以孔昭南都亂臣宜絕之煌言曰

孔昭罪與馬阮等然馬阮再賣浙東而孔昭以操江親
兵棲遲海上累年則其心尚可原也明年名振卒遺言
以所部歸煌言時王已去監國號通表滇中桂王遣使
加煌言左侍郎兼翰林院學士己亥成功與煌言會於
天台悉師北上六月成功攻鎮江煌言以偏師薄觀音
門乘虛原作應以意改入江浦會所遣別將以蕪湖降書至乃
至蕪湖傳檄郡縣大江南北相率來歸其已下者四府
三州二十四縣而成功以累捷又聞江北如破竹謂金
陵可且夕下前鋒將余新銳而輕士卒樵蘇四出營壘

一空北師諜知之以輕騎襲破前屯擒新去成功倉猝

移帳諸營瓦解其將甘輝

紀年云海澄人

以馬蹟被擒死之軍

遂大潰竟撤鎮江之師出海煌言歸路已梗乃引舟歸

鄱陽八月七日與楚師遇而兵潰焚舟登陸士卒尙數

百人歷霍山英山度東溪嶺追兵奄至士卒皆竄止一

童一卒從迷失道乃賂土人爲導變服夜行由樅陽湖

出江渡黃湓抵東流之張家灘陸

原作隨以意改

行建德祁門

原謫山拈

釋史正兩山之中由休寧入嚴州旣而山行自東陽

義烏出天台以達海壖樹燾鳴角散亡復集遣使告敗

滇中且引咎桂王手敕慰問加煌言兵部尙書兼東閣
大學士命仍奉魯王監國而成功自喪敗之後不能自
振思取臺灣以休士煌言貽書挽之謂軍有進寸無退
尺今入臺則將來兩島皆不可守孤天下之望矣成功
不聽王寅春滇中陷五月成功亦卒於臺北安撫使以
書來招煌言煌言復書略言不佞所以百折不回者上
則欲匡扶宗社下則欲保捍桑梓乃因國事之靡寧而
致民生之愈蹙十餘年來海上芻蕘糗糒之供樓櫓舟
航之費敲骨吸髓言之慘然況復重之以遷徙訖以流

離哀我人斯亦已勞止今執事旣以保民息兵爲言則
莫若盡復濱海之民卽以濱海之賦畀我在貴朝旣捐
棄地以收人心在不佞亦暫息爭端以俟天命當與執
事從容羊陸之交別求生聚教訓之區於十洲三島閒
而沿海藉我外兵以禦他盜是珠厓雖棄休息宜然朝
鮮自存艱貞如故特恐執事之疑且畏耳則請與幕府
約但使殘黎朝還故土不佞卽當夕挂高帆不重困此
一方也十一月魯王薨於金門煌言泣曰孤臣之栖栖
有待徒苦部下相依不去者以吾主上也今何望乎甲

辰六月遂散軍於南田之懸舉

小腆紀年作懸山舉

其地在海中

荒瘠無人山南有汊港可通舟楫而其北爲峭壁煌言

因結茅居之北帥懼終爲患募得其故校以夜半從山

背緣蘿踰嶺而入暗中執之七月十七日至寧波

紀年云十

七日被執越二日至寧波

北帥舉酒屬曰待公久矣煌言曰父死不

能葬國亡不能救死有餘罪今日之事速死而已何必

多言至杭州供帳如上賓自督撫而下無不敬禮之浙

人賂守者得覩一面爲幸煌言方巾葛衣終日南面坐

不言不食惟啜水而已見者以爲天神九月七日臨刑

赴市在竹輿中遙望鳳凰山一帶始一言曰好山色因

案筆賦絕命詞數章

行朝錄載其詞云義幟縱橫二十

光鈞筮澤難回范蠡船生北鴻毛猶負國死留碧血欲
支天忠貞自是孤臣事敢望千秋青史傳國亡家破欲
何之西子湖頭有我師日月雙懸于氏墓乾坤半壁岳
家祠慚將赤手分三席特爲丹心借一枝他日素車東
浙路怒濤豈必盡鴟夷何事孤臣竟息機魯戈不復挽
斜暉到來晚節慚松柏此去清風笑蕨薇雙鬢難容五
嶽任一帆仍向十洲歸疊山遲死文山早青史他年任
是非又明季南略所載二首諸書所無備錄之詩云擲
掄一息尙圖存吞炭吞瓊可其論復望臣靡興夏祀祇
悲帝眷答商孫衣冠猶帶雲霞色旌旆仍留日月痕羸
得孤臣同碩果也留正氣在乾坤不堪百折播孤臣一
望蒼茫九死身獨挽龍鬚空問鼎姑留螳臂強當輪謀
同曹社非無鬼哭向秦庭那有人可挺立受刑年四十
是紅羊剛換劫黃雲白草未曾春

五國朝賜諡忠烈參軍羅子木僕人楊冠玉殉焉子萬祺已先

三日死鎮江子木名綸以字行溧陽人已亥煌言師出
長江子木挾策上謁煌言奇之欲留之幕以父老辭成
功因強其奉父泛海子木至海上不欲參成功軍事奉
父北行將赴煌言軍猝遇北兵格鬪子木墮水得救起
而其父被縛去子木展轉閩南思出奇計以救父逾時
不得音問嘔血幾死復赴煌言軍煌言勉以立功卽爲
報讎遂相依不去竟同死冠玉鄞人

海東逸史卷十三

海東逸史卷十四

翁洲老民撰

忠義一

董志寧字幼安鄞縣人歲貢生以名節自勵乙酉六月
北兵入浙志寧與同里諸生陸宇燭張夢錫華夏王家
勤毛聚奎徧謁搢紳勸以舉義皆笑以爲狂獨刑部員
外郎錢肅樂是之顧其事莫能集閏六月八日餘姚兵
起明日會稽應之又明日鄞人始會議肅樂獨任之按
腆紀年餘姚兵起係初九日鄞縣則十二日也而故太僕謝三賓家富耦國適

從江上迎降歸惡聞其事定海總兵王之仁亦以迎降
得仍舊任者三賓私遺書乞以所部來斬此六狂生當
以千金爲壽之仁許之旣而中悔致書肅樂請自效三
賓不知也翌日大會演武場之仁出書責三賓令斬以
祭纛三賓叩頭乞哀請出家財充餉乃止魯王監國授
志寧大理寺評事視師瓜里而三賓亦至以賂結戚晚
張國俊驅躋東閣志寧遂棄官歸丙戌六月江干師潰
三賓復降時浙地盡陷祇存舟山石浦而航海之軍至
長垣連取閩海州縣且逼福州於是北兵之備浙者頗

抽以備閩浙中諸山因復結寨自固志寧與華夏王家
勤及諸生楊文琦楊文瓚屠獻宸董德欽等謀取寧紹
台諸府遣使走舟山約黃斌卿又約義旅之在四明者
王翊在東山者李長祥令以兵攻寧波而已翻城應之
復爲三賓所謀知發其事志寧與德欽逸去而五人皆
遇害所謂五君子也魯王至舟山遷志寧兵科都給事
中時時奉使入內地聯絡山寨諸軍以爲海上策應辛
卯九月舟山破自刎

明史通鑑輯覽南
疆釋史並作縊

死

國朝賜
諡忠節

繼妻

羅氏聞訃仰藥卒子士駿士驤蹈海不返僕文周縞素

終身

華夏字吉甫一字過宜號默農浙江定海人後遷鄞貢
生通樂律少與同里王家勤同受業於倪鴻寶又同學
於黃石齋又同參劉戡山講席杭州破與董志寧等佐
錢肅樂起兵魯王監國授職方郎中鮎埼亭集云授兵部司務進職方主
事江干師潰慟哭歸戊子復謀翻城之舉按行朝錄此舉在丁亥二
月乞師翁洲黃斌卿許之乃歸而其書爲偵者所得降
臣謝三賓證之遂被執當事詰同謀者夏慷慨獨承曰
心腹腎腸肝膽吾同謀也再拷之大呼曰太祖高皇帝

造謀烈皇帝主兵安皇帝主餉其餘甲申乙酉殉節諸
忠范公景文史公可法而下皆同謀也當事利三賓之
財亦誣以同謀令夏引之夏對曰若謝三賓者嵬齷鄙
夫反面易行首先送款建義之事何可引之三賓在旁
搏額以謝夏在獄中鼓琴賦詩如平日絕命時有白光
一縷沖天而去繼妻陸氏名玉辰知例當發遣慮有汙
辱乃結帨於梁引頸就縊帨忽絕復取結之須臾而盡
魯王監國翁洲贈簡討門人私諡曰毅烈

國朝人祀
忠義祠

張夢錫字雲生鄞縣人爲諸生精武事與董志寧等佐

錢肅樂起兵授兵部司務擢御史江干師潰走結山寨

曰大皎軍庚寅十月

小腆紀年作九月

北兵至夢錫持長矛出

鬪殺傷略相當眾寡不敵遂死其下五百餘人皆從之
無一降者當戰時有突圍而去者三人翼日有負夢錫
屍葬之大皎之南麓者卽此三人也

王家勤字宙一號石雁鄞縣人

小腆紀年云定海人

爲諸生通經

術三禮俱有論說受業劉宗周之門與董志寧等佐錢
肅樂起兵授大理寺評事江干師潰復謀翻城之舉事
洩被執移獄錢塘累訊瞠目無一語乃殺之門人私諡

忠潔著有靜遠閣集

陸宇燭字周明號贛庵鄞縣人右都御史世科子以諸生與董志寧等佐錢肅樂起兵授監紀推官俄進按察副使仍監軍江干師潰遜歸不出歷十八年復謀舉兵應海上事洩被執死之年五十六鄉人私謚節介

毛聚奎字象來一字文垣自號吞月子鄞縣人貢生與董志寧等佐錢肅樂起兵參瓜里幕務授戶部郎中專司餉事紹興破奔走山海之間累遭名捕行遜得免六狂生之幸得終老牖下者聚奎一人而已

屠獻宸字天生鄞縣人

小腆紀年云定海人

兵部侍郎大山曾孫

以諸生從軍授車駕司

勝朝殉節諸臣錄作兵部職方

主事江上事敗

角巾歸里戊子與華夏等同謀翻城之舉事洩被執死

之監國還軍翁洲贈大理寺丞

國朝賜諡烈愍

妻朱氏賢而有

文獻宸死賦絕命詞而自經

楊文琦字瑤仲號楚石鄞縣人唐王臨軒以貢生召對

授惠安訓導尋加監紀推官視惠安諸軍閭亡返浙與

華夏等同謀翻城之舉事洩被執不屈死妻沈氏亦白

經監國還軍翁洲贈兵科給事中

國朝人祀忠義祠

楊文琮字天璧監國時以諸生從軍授職方郎中

小腆紀年

作主事

戊子與謀翻城之舉事洩遁去張煌言託以聯絡

中土事自是每歲往來海上不絕癸卯有降卒自海上言文琮將引海上將趙彪爲患逮至錢塘歎曰吾固雁行中漏網也本可死矣賦絕命詞曰憑誰瘞我孤山上魄是梅花鶴是魂遂扼吭而卒

楊文瓚字贊玉號圓石鄞縣人崇禎十二年舉人監國初官御史力言閩浙宜合不宜分時方爭開讀禮多不以爲然文瓚乃入閩又力言當聯絡閩浙以爲同仇不

當啟爭端唐王然之乃命以掌貴州道扼防建延三關而浙東亡仙霞告急唐王出走乃返故里與華夏等同謀翻城之舉事洩被執大呼高皇帝不絕而死國朝賜諡烈愍妻張氏名玉如工翰墨文瓚死以紉聯其身首一慟幾絕遂衣其故時衣服題絕命詞一首解所佩帶自縊而絕監國還軍翁洲贈都察院右僉都御史

楊文球字天琅魯王監國授都督府都事翻城事洩二兄皆死乃之閩就閣部劉中藻於福寧令參幕府軍事次年福寧不守死之董德欽字若思鄞縣人小腆紀年云定海人

兵部侍郎光宏之孫以諸生從軍授監紀推官江干兵敗乃歸戊子與華夏等同謀事洩被執死之監國還軍翁洲贈兵部郎中

倪懋熹字仲晦一字煜生鄞縣人錢肅樂起兵欲貽書王之仁而難其使懋熹請行事遂定及畫江分守以職方主事參瓜里軍唐魯爭頒詔之禮越使陳謙入閩而死閩使陸清源入浙亦死議募一能者乃以懋熹往果稱旨令以僉事分守建寧丙戌北兵來攻出戰力不支死之時八月十一日也年三十九

徐啟睿字聖思鄞縣人爲諸生負才任氣感憤時事削髮爲僧聞錢肅樂等舉兵乃破關出投其營魯王授錦衣衛指揮不拜自稱白衣參軍時江上諸營多首鼠觀望無一肯發兵者啟睿乃集其麾下百人諭以大義提劒渡江直薄西岸北兵以爲游騎亦遣裨將禦之啟睿奮劒直前掩殺過半城上乃亟出銳師長圍四合遂被執諭之降大罵乃殺之

趙毅字金城平湖人尙氣節工武略嘗有百足蟲伏其臥處雖遠出數十里經宿蟲必至毅心竊喜自負謂他

日必能崛起布衣於是人皆呼爲趙百足云乙酉南都
破北兵至浙江魯王監國於紹興毅慨然仗劍從之授
左營游擊率軍與北兵戰於杭城外飛礮中首首已飛
去猶持劍策馬大戰北兵大駭爲少卻毅猶單騎馳逐
數里馬蹶墮地乃仆

李桐字封若號侗庵鄞縣人三歲而孤事兩母盡孝爲
諸生不屑數行墨甲申之變抗言於諸當事請發義旅
以待勤王之舉南都亡呼天大慟遂得疾呼祝宗祈死
會浙東舉義錢肅樂等強之起乃稍稍進食遣長子文

景從軍授兵部主事病稍愈明年六月紹興陷哭曰吾
今定死矣疾果作遂卒年四十九門人私謚貞愍先生
文景與弟文昱葬父畢墨纓赴海上崎嶇軍旅文昱亦
授戶部主事辛卯翁洲失守扈王出海遭風同溺死

路國挺

鄞縣志
路作略

字天植號寒厓諸暨人僑居鄞生有殊

才江東兵起破家輸餉授職方主事

鄞縣志云以奉擁
戴魯王箋得貢士

爲降臣謝三賓所惡幾殺之紹興破三賓復降國挺晦
迹里居三賓復散流言以激眾怒遂被逮久之得脫貧

困死

李文纘字昭武一字夢公號譽樵鄞縣人錢肅樂起兵
文纘以諸生實先從之授兵部員外郎江干師潰悒鬱
不自得戊子豫翻城之難被訊不爲遜詞在獄中與同
事楊文瓚分賦雁字詩一月之中遂成卷帙明年再訊
再被拷終不屈而華夏力任之乃放歸遨遊四方以老
臨終其子問遺言命取紙筆題曰眾人皆醒非夫也瞋
目而卒所著有春秋經傳纂注鹿溪新語賜隱樓古文
並散佚

杜懋俊字英侯鄞縣人

小腆紀年云定海人

世居縣東之管江爲

諸生以仗義聞浙東不守日夕痛哭與其叔兆植及施
邦煥聚眾三千刻期舉事謀洩邏者至懋俊梟其首據
山立寨鳴鼓起事與北兵轉戰三日及寨破懋俊猶以
家丁力戰頭目中矢如蝟倚牆而斃尸屹立不仆者數
日

杜兆植字承芝爲諸生嘗以兵法部勒族人分隊瞭野
擊柝行夜閭黨賴以安堵沿海諸村亦多倣而行之寨
破被執大罵不屈斫其首十二刀而後墜

施邦煥

雪交亭集作玠鮎埼亭集作
宗煥四明談助云一作宗玠

字仲茂

雪交亭集
作仲吳

鄞縣人諸生故都督僉事翰子其先世亦居管江因以
家財佐杜氏募死士事敗拔先世所遺佩刀自刎曰吾
不負此刀也

鮑埼亭集云事敗縱火自焚

時稱管江三烈士

魏耕原名璧字楚白甲申後改名字白衣又名甦號雪
竇山人慈谿人以贅壻僑居歸安遂充歸安學博士弟
子國亡棄去所交皆當世豪俠若上起兵亦與焉事敗
亡命江湖妻子滿獄弗恤也久之事解乃閉戶爲詩酷
嗜李供奉己亥鄭成功兵入長江幾下金陵江南半壁
震動知其謀出於耕刊章名捕亡命潛行癸卯又以海

上降卒至語連耕遁入山陰蹤跡得之至錢塘抗詞不
屈死於菜市山陰人李達楊遷經營其喪甚力亦以是
遣戍先是歸安諸生錢纘曾與耕善耕被執纘曾以兼
金賄吏得解孔孟文者險人也從成功軍來有所求於
纘曾不饜并怨耕以其蠟書首之故纘曾亦被殺番禺
屈大均不可一世獨心折耕詩嘗有詩云平生梁雪竇
是我最知音一自斯人死三年不鼓琴

汪涵字叔度號晦溪奉化人諸生從學黃宗羲遂參其
軍事浙東失守監國由江門入海涵隨宗羲走四明山

中宗義偶出邏卒至焚寨夜半火起同里出鬪從烈焰中殺數人已得出歎曰所圖不遂命也不死且自取辱還鬪而死

張廷綬字雲衢鄞縣人少喜讀兵法善挽強弓舞大刀

補武學生錢肅樂起兵以驍勇署總統陳函耀鄞縣志作函輝

此疑起兵台州而以會推留中調度乃以其兵屬之廷

綬奏授都督僉事統所部還鎮台之海門已而閩中大將李唐禧至監國以其宿將使共治軍於台唐禧故金山衛官起兵不克入閩由閩入浙廷綬讓之凡署衙列

座必使居己上而唐禧自以客將每事皆咨廷綬而行
大兵入台唐禧謂廷綬曰公當俟陳公消息然兵已逼
不如偕我早死徒殺士卒無爲也廷綬曰諾各遣其麾下
袍笏兀坐營門大兵過其營諭降不屈殺之唐禧亦
被殺而廷綬眷屬之從軍者皆死無一存

章有功會稽農夫也浙東建義應募從軍驍銳敢戰以
指揮爲前鋒華夏等翻城謀洩大兵急攻東山有功所
將五百人皆具兼人勇每戰必勝大兵以全力壓之不
支被擒拉脅決齒垂斃猶大罵而死

章欽臣督師孫嘉績部將也以都督司別營火攻事江上破欽臣散軍亡命其後以應山寨諸軍事敗被執死之妻金氏沒入旗下將發遣大罵不屈竟磔之行刑者見氏有姿不無褻語氏罵愈甚刑畢而其人暴死氏遂時時降神東越居民尸祝之

戴爾惠字少峰鄞縣布衣錢肅樂倡義時大會城隍廟爾惠舉手一麾三四千人皆從之相與擁肅樂赴巡按署遂舉事以戰功封義武將軍江干失守遁歸其後山寨大起復出而預之遂一門殉焉

海東逸史卷十四

海東逸史卷十五

翁洲老民撰

忠義二

傅巖字野倩義烏人崇禎七年進士授歙縣知縣被讒去官魯王監國擢江西道御史爲朱大典監軍北兵破

金華與二子齡發齡熙並死之

小腆紀年云巖還至義烏死國朝賜諡節愍子

附入

初巖之遇禍刃將及齡熙年甫十四以身翼蔽其

父刃著於頤而死齡發趨救矢洞右腋移時復甦見父弟已死遂以手抉其創而卒長子齡文從外至得不死

乃奉其母歸杭州藜藿不充蓬頭垢面者又十餘年而終

王之拭

勝朝殉節諸臣錄作拭

字瞻御南直武進人甲申殉難忠

臣章子南都不守東走至鄞截江之役監國令以墨纓任車駕王事知鄞縣事其制詞曰以汝父之遺愛望厥子之世忠之拭泣而受命蓋章初亦爲鄞縣令也已見江上事不可爲辭去入閩唐王令仍管駕部事而閩事亦壞復返鄞閣部朱大典守金華招之之拭乃爲之練兵於義烏兵敗入山中謀再舉被執

勝朝殉節諸臣錄云至永康被執

不屈死之

國朝賜諡忠節

林汝翥字大歲號心泓福清人萬曆末舉於鄉授沛縣知縣天啟二年以擊白蓮賊徐鴻儒緝妖人王普光等功擢御史巡視京城忤逆閹魏忠賢廷杖削籍崇禎末起廣東瓊州道坐奸民煽亂貶秩歸福王時起雲南僉事

小旗紀年云

起臨沅道

已而解職魯王次長垣召爲兵部右侍

郎總督義師與員外郎林奎攻取福寧兵敗被執諭降

不從繫之除夕吞金屑死

國朝賜諡忠節

林奎字子野號恥齋汝翥同邑人

勝朝殉節諸臣錄云侯官人

崇禎

十六年進士授海寧知縣南都亡杭州亦不守營卒乘機乞餉環署大噪塗罪爲首者而如其請以城孤不能

存引去唐王時黃道周

小腆紀年云字幼平漳浦人門下士稱石齋先生天啟壬戌進

士歷官至兵吏二部尙書武英殿大學士乙酉十二月
婺源敗績被執明年三月至江寧不屈死贈文明伯諡
忠烈國朝改諡忠端督師請與偕行以戶部員外郎司餉改監察

御史往諭浙西行至贛州以典銓缺人召還復改文選

員外郎主銓政

殉節諸臣錄云一作左僉都御史

奎曰此潤色太平之

事非今日之所急也乃辭去募兵數千人爲鄭芝龍所

阻聞王被殺號痛而返散兵入山制棺一具布衣一襲

書大明孤臣之極以待死及魯王航海至長垣郡邑響
應福清鄉兵請盜爲主盜別其父曰兒當死久矣奉命
守海寧失城池當死扈蹕不終當死豈可再使延命漏
刻以不令之名貽羞父母乎遂苴履負戈雜徒旅中與
汝翥攻取福寧身被數創猶勒兵力戰爲流矢中喉而
死國朝賜諡烈愍友人葉子器者初在營中爲北兵所獲使之
作書招盜子器書所作絕命詞授之亦被殺南疆釋史云二林皆福州人因攻取福清死

俞元良字仲驤

南疆釋史云字綴穀

海寧人崇禎癸未進士魯王

監國熊汝霖以數百人襲海寧士民迎之者萬人汝霖
欲擇一人主兵而紳士持論皆首鼠汝霖數陳大義元
良慨然曰此豈公一人之事某焉敢獨後遂以監軍兼
攝海寧縣事及北兵破城與兄元禮同殉節死

國朝賜
元良諡

節愍兄
附入祠

周宗彝字五重海寧人崇禎十二年舉人少受業於吳
太冲章正宸爲人有膽決尙氣節嘉興之城守也宗彝
亦集里中少年應之魯王授職方員外郎大學士熊汝
霖令守硤石鎮兵潰赴海死

國朝入祀忠義
祠弟啟琦附

妻卜氏與

二妾名朱衣紫衣者並自縊弟啟琦巷戰力竭亦被殺

湯芬字方侯嘉善人

勝朝殉節諸臣錄云一作海鹽人

崇禎十六年進

士福王時爲史可法監紀推官唐王以爲御史尋以福

建參政

小腆紀年云魯監國擢是職

分守福興泉三府興化城破緋

衣坐堂上被殺

國朝賜諡烈愍

林喟字小眉莆田人由進士爲吳江知縣蘇州失歸事

唐王官御史

小腆紀年云授給事中

復事魯王爲吏科給事中

勝朝

殉節諸臣錄云一作禮部精膳司員外郎

興化破自縊死

國朝賜諡節愍

都廷諫杭州人官莆田知縣城破死之

勝朝殉節諸臣錄云興化破死

之國朝賜
諡節愍

洪有文官澄海

勝朝殉節諸臣錄南疆繹史並作知縣海澄小腆紀年作漳浦監國紀同

城破死之

國朝賜諡節愍

鄔正畿字王都

南疆繹史云字鴻原

永福人官兵科給事中鄭彩

專政棄官歸里居城破賦絕命詞投水死

國朝賜諡節愍

林逢經字守一永福人以御史里居城破投水死

國朝賜諡

節愍

王恩及長樂人官御史遷太常

按小腆紀年止稱御史未遷是職

里居

城破服毒死妻李氏亦死焉諡忠襄

國朝改諡節愍

王祈太倉人建寧守將封鄖國公建寧破巷戰不勝自

焚死

國朝賜諡烈愍

沈履祥字其旋號復庵慈谿人大學士宸荃從兄也登
崇禎十年丁丑進士知侯官甌寧二縣有循績福王時
上治安策又上責成疏頗見採納魯藩監國以御史督
餉台州城破遜之山中北兵搜山得之被殺於野其弟
穀祥往求其屍得其首於桑園得其身於亂屍中以服
帶可據也乃紉合而葬之

國朝賜諡節愍

陳世亨官中書舍人爲鄧藩審理以一旅復安固援兵

不繼被執大罵而死

海東逸史卷十五

海東逸史卷十六

翁洲老民撰

忠義三

高岱字魯瞻號白浦會稽人崇禎中以武學生舉順天鄉試被黜久之辨復魯王監國授職方主事及紹興失守慨然曰上恩厚矣國家文武異途重文輕武佔嚙小生持議廟堂而戮力疆場者指爲癰人以致寇盜充斥不能抗禦神州陸沈職是故也我本武學得授文職偪側搶攘無益毫髮尙不能以一死報國乎劉蕡山吾鄉

先生也吾當師之卽絕粒祈死其子諸生朗坐守之閱
八日知父意不可回泣拜父前曰兒請先之乃攜巾服
泛小舟給舟子出海禱神去岸遠北面再拜躍入海中
舟子急挽之齧舟子臂始得下舟子又入水救之捽其
巾朗躍出水面正巾而沒岱聞之曰兒果能先我乎自
是不復言又閱數日而卒

國朝賜諡節愍子附入祠

葉如蒞字衡生會稽人崇禎三年舉人魯王監國與同
里高岱同授兵部主事每會食相與抵掌言忠孝事紹
興破與妻王氏出居桐塢墓所岱送之曰君殆隱於是

乎如菴曰非也我無城守責死於墓耳遂與王氏並赴

水死

國朝賜諡節愍

王以被救免次日復死之

徐復儀字漢官號雪潭錢塘人

小腆紀年云上虞人

崇禎癸未進

士福王立授刑部員外郎明年主試雲南行數日而南

都陷歸事魯王加翰林院編修辭曰侍從文墨所以潤

色太平也今戎馬日逼臣不得馳驅疆場爲陛下負弩

矢猥賜臣清燕死無以塞責不報未幾浙東破歸家拜

父母別妻子泣奔蹲山投空谷中虎豹觸之不爲怪一

日大風雨晝晦傳聞兵四合乃曰吾命盡矣遂扼喉死

紀年云投崖死勝朝殉節諸臣錄云抗拒死待上而父始至持其首而泣目

尙張父曰兒得死所矣乃瞑

國朝賜諡節愍

唐自綵字西望四川達州籍江寧人崇禎末以貢生官
臨安知縣有循聲杭州失守自綵與姪偕豫逃山中有
言其受魯王敕陰部署爲變者遂被捕獲北帥諭之曰
我知汝賢更故不加兵行且薦於朝矣自綵曰士各有
志安用相強北帥曰獨不念少妾幼子乎自綵曰大丈夫
豈以子女易大節卒與姪偕死

國朝賜諡忠節

其妾大呼願

從死亦殺之偕豫字敬子

南疆釋史偕作階子作之

亦貢生唐王贈

自綵太常寺少卿偕豫太常寺博士

王玉藻字質夫號螺山南直江都人司勳郎納諫子崇禎癸未進士授慈谿知縣有異政甲申國變哀號求死家人勸之乃止南都繼陷與沈宸荃共起兵進御史尋以兵科都給事中往軍前而江上諸帥惡其任事邁往壯氣勃然皆不予餉乃力請還朝在垣中持正又不爲諸臣所喜乃力求罷不許及紹興失守王走海島玉藻仰天大慟躍入池中復爲家人所救得免遂隱居不出終身不鬚髮不改故衣冠一夕忽作絕命詞曰半生辛

苦泣孤臣賸得乾乾淨淨身四大既崩神失散這篇草

稿付誰人擲筆而逝

小腆紀年云辛卯後歸故鄉以餓死

年六十六玉藻

爲令時首拔童子姚亦方國亡後亦棄衣巾來依玉藻
往往無人時師弟相對悲嘯久之成癲疾每一動念疾
輒作作則踴躍跣跣繞屋而泣竟以癲死

周元懋字柱礎一字德林鄞縣人文穆公應賓從子以
文穆蔭官南京右軍都事工部屯田郎中

原作屯部郎中以意改

知貴州思南府丁艱未赴而京師陷江東建國錢肅樂
等招之固辭不出而破家輸餉不吝丙戌六月江上失

守慟哭自沈於水以救得甦乃披髻爲僧日夕縱酒嘔血而卒

周元初字自一號立之文穆公應賓從子文穆無子撫以爲子少負大略所交皆忠義士江東建國罄家財以輸餉錢肅樂以文穆遺恩奏授郎署不受遂以白帟從軍紹興破行遯深山以死

倪懋楷

鮎埼亭集作元楷

字端卿與懋熹同族同起江上授大

理寺評事事去歸家以不髻髮被執論死下獄其母遣人攜酒入獄飲之醉熟睡盡去其髮醒而禿矣痛哭欲

自裁旁人以母命止之得免

朱養時江陰人官兵部郎中兼禮科給事中舟山破抗

節死

國朝賜諡節愍

董廣生

原闕

人官御史舟山破自焚死

楊鼎臣字思任鄞縣人官吏部文選司主事舟山破先

驅妻子入井乃從之

林瑛

勝朝殉節諸臣錄云一作之瑛

字玉之

南疆釋史作玉英

福建人官吏部

主事同母妻女及壻五人航海入浙壻隨鄭彩去瑛至

健跳所母死貧甚妻陳氏及女爲人紉衣給食已而女

死及舟山破瑛與陳氏並自縊

國朝賜諡節愍

江用楫蘇州人官戶部主事舟山破殉節死

國朝賜諡節愍

妻

原闕

氏亦自盡

董玄會稽人官禮部祠祭司主事舟山破自縊於學宮

國朝賜

諡節愍

張家璧

原闕

人官禮部儀制司主事舟山破自投城下

未死被執勸之降不從乃殺之

朱萬年福建人官兵部主事

勝朝殉節諸臣錄一云職方員外郎

舟山破

死之

國朝賜諡節愍

顧珍長洲人官兵部主事舟山破死之

國朝賜諡節愍

李開國臨水衛人

南疆釋史作臨山衛人

官職方主事舟山破死

之

國朝賜諡節愍

母原闕氏亦自縊

顧宗堯長洲人

勝朝殉節諸臣錄一云寧波人

官工部主事舟山破同

母死之

國朝賜諡節愍

顧玠

江中汜

陳所學

顧行

翁健

小腆紀年云顧玠陳所學

山陰人南疆釋史摭遺云陳所學字顧行無江中汜翁健名

並中書舍人舟山破皆

死之

戴仲明鄞縣人官工部營繕所所正舟山破殉節死

國朝

賜諡

節愍

章有期

原闕

人官太醫院院副舟山破自焚死

劉世勳字胤之南直上元人崇禎末以武進士歷官都督僉事助防翁洲黃斌卿不能用監國駐師進安洋將軍辛卯八月大兵分道下舟山張名振奉王出海而世勳城守世勳料簡城中步卒尙有五千麾下死士五百居民助之乘城而守大兵屢攻屢卻乃益兵攻之城陷世勳朝服北面望海拜謝自刎而死

國朝賜諡烈愍

王朝相大興人官錦衣指揮舟山破護元妃陳氏貴嬪

張氏義陽王姬杜氏入井用巨石覆之卽自刎其旁國朝

賜諡

烈愍

劉朝原闕人內官監太監舟山破視宮簪入井畢卽自

刎其旁

海東逸史卷十六

海東逸史卷十七

翁洲老民撰

忠義四

張槌字子隆號四岑鄞縣布衣性坦率敦倫紀國變後日咄咄會髭髮令下閉戶坐室中取酒獨酌摩其頂而歎曰彼曲局者惡可以兵之乎乃往竈下得炭滿甕和以木屑置牀下爇之投身其上覆以重衿時方盛暑俄頃酒力墳盈而絕昇屍出已紺色矣丙戌六月二十日也

倪文徵字舜平山陰人以布衣爲蒙師兼通醫術紹興
破市酒肴飲里中少年求辦一事有諾之者偕至墓所
命掘坎自瘞眾駭欲散文徵悲甚曰此何事可誤我乎
或尼之曰死義也今某某等皆不死汝一醫生何自苦
文徵曰人各行其志惟諸公玉予於成也一人曰豈可
使土親膚乎以二缸贈之埋於坎中文徵趺坐其內命
覆之封其隙眾環坐竊聽微聞其聲逾三時而寂

國朝人祀

忠義祠

朱瑋

小腆紀年作煒

字鴻儒山陰人諸生

南疆繹史稱布衣

北兵至浙

避家梅里尖江上師潰人皆竄伏瑋痛哭不已曰此日
而生全歸之謂何乃書絕命詞二語於几上潛往礁石
躍水死家人徧覓不得見遺語始知其赴難也年甫二

十四

國朝入祀
忠義祠

鄒欽光瑞安人諸生

明季南略光作堯字
維則永嘉人郡庠生

紹興破溺死

國朝入祀

忠義祠

鄒之琦永嘉人諸生紹興破投水死

國朝入祀
忠義祠

張君正浦江人諸生郡城破自縊於明倫堂

國朝入祀
忠義祠

傅日炯字中貢諸暨人爲諸生與其族父平公同受業

劉宗周之門江干師潰兩人相謂曰吾輩義固當死然俱有老母在亦惟白於老母許死則死耳平公白於母不許日炯白於母許之遂赴湄池死平公乃養日炯母終身

國朝賜日炯入祀忠義祠

趙景麟鄞縣人諸生

明史作布衣

寓居紹興江上師潰整巾

服懷所作文走謁文廟拜先聖畢赴泮池死

鄞縣志趙景麟字天

生蓋一人無赴泮池事小腆紀年云投泮池不死後絕食死

趙天生鄞縣人爲諸生有節概丙戌六月江上失守題詩案上曰書生不律難驅敵何處秦庭可借兵只有東

津橋下水西流直接汨羅清竟往城東躍入江水漁人
救之舁還不食不語乃強輿入太白山欲令食不可則
爲謬語以慰之或曰李侍郎長祥克紹興矣或曰翁洲
大將黃斌卿將奉監國來恢復矣或曰石浦大將張名
振奇捷矣或曰四明山寨下慈谿矣天生聞之卽進食
如是者半年謬語漸窮而天生病亦稍愈聞出山中問
樵子輩以近事則循髮示之曰天下大定更何問焉天
生大慟踣地更不復食竟餓死鄉人私謚節愍先生朝

入祀忠

義祠

周西字方人定海衛人丙戌六月紹興破年僅二十六也歎曰楊鐵崖稱老寡婦今其時矣遂棄舉業訓蒙養母所著詩古文曰痛定集嘗與友人書曰今日所斷不可當者妄欲以義士自欺也夫何地非我朝之士何人非我朝之民又何倉庾非我朝之粟不必爲首陽頑民以自表異也所謂義士者當爲蹈海之魯連爭帝暴秦奮臂之陳涉特起發難張良之報讎翟義之討賊駱賓王之草檄謝枋得之卻聘而死否則如陳咸之閉戶不出梅福之逃吳門爲市卒陶潛之終身爲晉處士此雖

不得志於今亦當知重於後而我皆未能也其敢侈談義士乎此書蓋其自道云

張成義字能信慈谿人有異材爲諸生受業劉宗周之門江干師潰起兵不克行遯不返莫知所終

趙甸字禹功會稽人少極貧學幣以養親藝絕工時稱爲趙孝子長游劉宗周之門得其學丙戌後有高節隱於緇時賣畫以自給世所稱壁原闕二字士畫者也晚講學偁山卽宗周少時讀書地

葉尙高字而立樂清人温州府學生亂後佯狂幅巾大

袖行於市太守見而執之賦詩云北風袖大惹寒涼惱
殺溫州刺史腸何似蜉蝣易生死得全楚楚好衣裳太
守釋之不問丁亥二月上丁攜水一杯采芹一束乘太
守未釋奠哭於孔子之庭曰吾師乎吾師乎縱泰山之
已頽曾林放之不如乎太守至怒繫之獄迨五月四日
語獄卒曰詰朝屈大夫沈湘之日吾其死夫俾具湯沐
至明自經明季南略云字而栗永嘉縣學生獄中和正氣歌有未吞蒲酒心先醉不浴蘭湯骨已香
之句飲藥
痛罵死

朱錫齡字元序上海人諸生己酉松江破偕華亭蕭賓

侯渡海而寓舟山僧寺舟山破死之

婁文煥字長明象山人諸生

監國紀作貢生

舟山破痛哭具衣

冠別親族拱坐海邊沙上潮至隨水湧去越數日其屍

復隨潮至顏色如生遠近驚以爲神張名振在石浦聞

之來臨哭焉

國朝入祀忠義祠

林世英福建人諸生舟山破殉節死

國朝入祀忠義祠

陳瑞芝定海人諸生北兵圍舟山其母李氏嫠也密紉

衣上下連爲一曰吾苦節十餘年不可使人見吾體及

城陷卽躍入井中死瑞芝倉皇自外至聞母死亦自縊

李年三十六瑞芝甫十七也

周容字茂三號鄖山鄞縣人爲諸生受知黃宗義能詩
善書畫滄桑之際嘗渡蛟門脫友人之厄幾死不悔足
跡徧天下所至皆有詩康熙己未歲有欲以博學鴻詞
薦者歎曰吾雖周容實商容也遂止所著有春酒堂集
朱金芝字漢生前上續耆舊傳云一字曉庵鄞縣人少從黃道周游
得其易學甲申之變方在北都削髮南歸自號忍辱道人
流滯白門又遭兵禍遂往來英霍諸山寨及太湖軍
中幾死者數矣既知海上之局始返里門亦牽連被捕

亡命深山久之喟然襍被長往或云直抵辰沅客中湘

王幕中湘殉節

按小腆紀年何騰蛟湘潭殉節贈中湘王諡忠烈

不知所終或

云曾入滇中崎嶇扈從卒死王事或云投鄖陽山中爲道士不可得而詳也所著詩集二十餘種皆散佚不傳紀五昌字衷文鄞縣人性倜儻不欲以經生自位置所與游多奇才劒客受業錢肅樂之門肅樂航海死於閩家人不知五昌所在月餘而返乃知爲哭肅樂入閩也卜居太白山中足跡不入城市自言年六十二當終已而果然

趙自新字我完太倉人四歲失足墮井家人引縋出之無怖色年十一從父觀射飛矢中股醫者治之出鏃色不變喪母家貧身執廝養役而勤學弗輟崇禎十二年舉於鄉父老思就祿養十六年需次京邸忽心痛遂歸父果病劇乙酉詣州守請給僧牒微服出行祝髮於松江之會龍庵旋隱嘉定之封家村既有謝姓者告以應舟山之招自新謝之及事洩逮者至門自新與弟方弈徐斂手就縛曰吾久辦此矣械至松江絕食數日不死復械至江寧時主讞者爲洪承疇自新昂身前對曰

身爲故國遺民豈嘗須臾忘死哉顧有志無其事徒負
虛名竊用爲媿復鞠謝姓者卒無實得釋歸旬日卒年
五十三臨終謂其子曰吾生無益於世歿後題墓石曰
明鄉進士憤道僧趙某願足矣著作甚多陳瑚陸世儀
皆其弟子

海東逸史卷十七

海東逸史卷十八

翁洲老民撰

遺民

于穎字穎長號九瀛金壇人崇禎四年進士由工部員外郎歷知順德西安二府罷歸福王立起知紹興府分巡寧紹台道南都亡北兵至杭穎密募兵舉義北帥使人以榜至穎執之禁其榜鳴鼓會眾誓於都亭以五百人夜赴固陵北兵在西岸未之知也乃衝潮徑渡盡驅西岸之船而東至中流北兵始知之無所得船穎軍上

東岸大噪遂盡江而守一軍扼潭頭一軍扼橋司一軍扼海門一軍扼七條沙北兵拽內河船百餘江干又紮木排填土擬東渡潁復遣死士沈其舟會西北風起木排飄向東岸各營得句致以爲用潁謂諸將曰杭已有重兵攻之不易莫若於下流由橋司入海寧出海鹽以通震澤上流由潭頭入富陽通餘杭以扼獨松關昨聞海寧兵已起而富陽尙爲北人所據不可坐視乃遣人夜襲之遂通餘杭之道於是方國安得駐七條沙江干立國北兵所以不能遽渡者以潁之取富陽也魯王至

越擢按察使行巡撫事尋進右僉都御史督師當是時
正兵義兵爭地爭餉內外交訐潁以守土臣悉力支拄
而方王諸將終惡之三疏乞休不許丙戌六月北兵至
列戍皆潰王航海去潁扈從不及乃由海道還京口黃
冠以終

林時對字殿颺號繭庵鄞縣人崇禎十三年進士年未
冠也授行人性恬淡嘗曰士人若愛一錢卽不值一錢

丁艱歸福王立起吏科都給事中

甬上續耆舊傳云福王監國召爲御史鄞

縣志据莊元辰爲阮大鍼所惡罷歸魯王監國遷太常
奏疏亦從御史

寺卿佐孫嘉績幕事力主渡江熊汝霖之下海寧時對
實贊之擢都察院右僉都御史逾年而紹興陷遂歸又
十八年而卒所著繭庵逸史皆紀國難事

李長祥字研齋四川達州人生而神采英毅喜談兵是
時獻賊縱橫蜀中長祥練鄉勇躬擐甲冑以助城守賊
中皆知其名崇禎癸未成進士授庶吉士同里薛國觀
方爲首輔欲引爲私人拒之京師陷南奔改監察御史
巡浙鹽而南都又覆乃起兵浙東魯王加右僉都御史
督師西行而七條沙之兵又潰王浮海長祥以餘眾結

寨上虞之東山時浙東諸寨林立顧無所得餉四出募
輸居民苦之獨長祥與張煌言王翊且屯且耕井邑不
擾戊子監軍華夏爲長祥聯絡布置請引劬洲之兵合
諸寨以下西陵議奉長祥爲盟主刻期將集而降臣謝
三賓告之大兵急攻東山長祥匿勾人舟中遁至奉化
依王朝先朝先亦蜀人得其資助由健跳所入舟山加
兵部左侍郎兼官如故辛卯舟山破亡命江淮聞大兵
得之京口安置江寧羈守之長祥忽娶一妾朝夕甚昵
守者謂長祥有所戀矣稍懈而長祥竟遁去由吳門渡

秦郵走河北徧歷宣府大同復南下百粵與屈大均處者久之天下大定始居毘陵築讀易臺以老焉著有天

問閣

原闕

四卷

黃宗義字太冲號梨洲餘姚人忠端公尊素子爲諸生受業劉宗周學行醇備家禍國難備嘗艱苦北兵入浙孫嘉績熊汝霖等以一旅之師畫江而守宗義亦合子弟數百人隨諸軍於江上人呼之曰世忠營授職方主事改御史總兵陳梧自嘉興之乍浦浮海至餘姚大掠職方主事王正中署縣事集民兵擊殺之亂兵大噪有

欲罷正中以安諸營者宗義曰借喪亂以濟其私致干
眾怒是賊也正中守土卽當爲國保民何罪之有尋以
宗義所作監國魯元年大統曆頒之浙東馬士英在方
國安營欲入朝朝臣皆言其當殺熊汝霖曰此非殺士
英時也宗義曰諸臣力不能殺耳春秋之孔子豈能加
於陳恆但不得謂其不當殺也汝霖謝焉又謂諸將曰
諸公何不乘機決戰由赭山直趨浙西而日於江上放
船鳴鼓攻其有備蓋意在自守也然鼓爾三府以供十
萬之眾一年之後恐不能支聞者皆是之而不能用張

國柱之浮海至也諸營大震廷議欲以伯爵餌之宗義曰若是則獎亂也何以待後乃署爲勝虜將軍始去與太僕陳潛夫尙寶朱大定主事吳乃武查繼佐及正中等謀會師由海寧以取海鹽因入太湖以招吳中豪傑而江上師潰乃入四明山結寨自固己丑聞王在海上乃與都御史方端士赴之擢右僉都御史進左副都時方發使拜山寨諸營官爵宗義言諸營之強莫如王翊其乃心王室亦莫如翊諸營文臣輒自稱都御史侍郎武臣自稱都督其不自張大亦莫如翊宜優其爵使之

總臨諸營以捍海上遂拜朔右僉都御史而是時諸帥之悍甚於方王宗義旣失兵日與尙書吳鍾巒坐船中講學而已是冬命澄波將軍阮美使日本以兵部右侍郎馮京第及宗義監其軍以行至長崎島不得要領而還久之以母老乞歸

黃宗炎字晦木一字立谿人稱鵬鵠先生餘姚人忠端公次子崇禎中貢生畫江之役兄弟步迎監國事敗入四明參馮侍郎京第軍事馮軍敗隱於白雲莊亂定游石門海昌間賣畫自給畫宗小李將軍趙千里工繆篆

又善製硯所著有周易象詞尋門餘論易圖辨惑諸書
陳希友字孝兼長樂人舉人官兵科給事中鄭彩殺熊
汝霖特疏參之不納知不爲彩所容乃繳印披髮去

熊曰繪字遯木黃州人督師文燦子官兵科給事中與
同僚陳希友同劾鄭彩草疏送督臣錢肅樂肅樂浩歎
勸其火之曰繪大慟竟自去嘗有詩云一身如洗惟存
髮兩手無成膽有心

任廷貴籍貫未詳官太常卿舟山破從王航海至廈門
尋至金門壬辰九月奉命北上至北茭洋舟覆得救遂

髻髮爲僧有詩云還將不二證西歸未遂黃冠卽衲衣
力任四十餘年事癡擔六十七年非翩翩野鶴隨雲適
點點寒梅鬪雪霏勘破瞿然成正覺澄潭明月自相依
蓋亦志節士也

沈崇埰字宇昆慈谿人大學士宸荃族弟崇禎十六年
進士授金壇知縣其父手書忠君愛國勿玷清白家聲
十字付之魯王監國擢兵部主事紹興破棄官耕於野
順治庚寅黃陂王爾祿爲巡海道以同年生屏車騎至
海濱訪之崇埰稱病不起爾祿徘徊門外久之乃長歎

而去

周齊曾字思沂鄞縣人崇禎十六年進士授廣東順德知縣邑故多盜齊曾捕得其魁置之辟向之爲逋逃主者乃中以飛語遂罷歸魯王監國起給事中紹興破痛哭入山結茅爲庵託於禪以自晦更號囊雲裏足不入城市順治庚寅王爾祿爲巡海道以同年誼屢致書冀其一見終不至所著詩文清高曠逸絕去煙火沒後鄉人欽其高風私謚曰貞靖先生

高宇泰字元發又字虞尊號蘗庵鄞縣人父斗樞官陝

西巡撫

鄧縣志云以斗樞爲漢中巡撫未到任

宇泰少負才名乙酉六月

從錢肅樂等起兵監國手諭獎之謂不媿江東喬木授

兵部武選員外郎尋以奉使過里門而江上陷時斗樞

尙在陝

鄧縣志云六月之役斗樞尙在鄖

而陝已內附乃閒道來歸父

子並豫海上事丙戌冬蠟書自海至謀者得之

四字据鮎崎亭

集補遂首被捕戊子夏華王事洩再被囚繫辛卯幾復株

累僅而得免壬寅之逮尤爲震撼雖幸得保而家已破

矣所著有雪交亭集雪交亭者張肯堂翁洲所寓也宇

泰愛之故取以名其集

盧若騰字閑之號牧舟福建同安人崇禎庚辰進士召對稱旨卽授寧紹台道僉事剔奸弊抑勢豪風裁凜然與寧波知府陸自嶽平奉化姦民胡乘龍之亂閩井晏然京師旣陷南都命以都御史撫鳳陽未行而南都又亡閩中拜兵部尙書撫軍永嘉甫至而事勢已瓦解徘徊鎮下關浮海至翁洲閒行入大蘭諸山寨父老壺漿上謁若騰垂涕而遣之及海上之局一時同袍澤者並極莫逆諸人淪喪殆盡獨與張煌言同事最久竟依鄭氏以終

沈文光

鄞縣志作光文

字文開號斯庵鄞縣人以明經貢太學

豫於畫江之役授太常博士浮海至長垣再豫琅江諸軍事擢工部郎中閩師潰而北扈從不及聞粵中方舉事乃走肇慶遷太僕寺少卿由潮陽航海抵金門常事以書幣招之文光焚書返幣及鄭成功克臺灣遂依之以終所著詩文甚多皆賦臺灣風景

朱憲宗一作顯宗字闇生崑山人以歲貢授丹陽訓導丁內艱歸福王時起補衢州府西安訓導南都陷逃兵敗將所至蹂躪而衢當其衝魯王命西安令守衢而以

憲宗攝縣事撫輯兵民勞績甚著明年授監軍理刑專
司餉事轉餉開化北兵至被執諭之降不從殺五弁相
脅終不動械致金陵意必死矣有故交以百口保之者
放還開化時衢猶未下守將知憲宗不屈而還請其事
憲宗謝以病衢兵復開化強之安撫甫三日而衢破遂
歸久之卒於家

徐桐字古木嘉興人有膂力善射挽兩石弓百發百中
工擊劍能飛斬人頭百步外通詩古文詞人目爲文武
才紹興建國當事薦爲游擊將軍率軍守嘉禾城破遂

入太湖後鬚染爲僧號木頭陀以岐黃術終其身

馮元颺字沛祖慈谿人天津巡撫元颺兵部尙書元颺弟以五經中崇禎十六年進士死於海外年三十二

董守諭字次公浙江通志父世登性至孝工詩爲諸生有名

甬上耆舊傳守諭秉資耿介不俯同流俗浙江志少受業於黃道

周講學大滌山中全祖望學蘭集題詞讀書討古窮極幽遠浙江志倪

元潞見其文大稱賞之題詞天啟四年舉於鄉與翁鴻業

姜思睿齊名所謂浙東三俊也南疆七試南宮不第而

學日進名曰盛東江初建尙書李白春薦守諭授戶部

貴州司主事

續音舊傳

時分饒分地之議起分饒者以孫嘉

績熊汝霖之師謂之義兵食義饒以方國安王之仁之

師謂之正兵食正饒正饒田賦所出義饒勸分無名之

征也分地者某正兵支某邑正饒某義兵支某邑義饒

也魯王令會議方王司饒者皆至殿陛譁然

魯紀年

守諭

厲聲進曰公等今日所爲何事而不爲咫尺天威地乎

乃面奏分饒分地非也當以一切正供悉歸戶部覈兵

而後酌給之所謂義饒者雖有其名不可爲繼是散遣

義兵之別名王以爲然

黃宗義撰墓志

方王諸將不可戶部主

事邵之詹乃調停之卒從原議守諭歎曰江上從此潰

矣續耆舊傳無何王之仁請稅漁舟守諭謂其客曰今日所

恃者人心耳料謹案續耆舊傳作料及漁舟其細已甚民弗堪也

之仁又請塞鄞之萬金湖爲田又請行稅人法又請官

賣大戶祀田三疏既上兵士抽刃守諭門以待覆守諭

疏言湖不可塞祀田不可官賣稅人必至激變之仁大

怒謂行朝大臣尙不敢裁量幕府何物豎儒乃爾事事

中格乎上言得孟軻百不如得商鞅一得談仁講義之

徒百不如得雞鳴狗盜之雄一遂折簡召守諭王雖惜

守諭不能爲力陰使避之守諭慷慨對曰命吏生死聽於主上非之仁所能專臣歸死上前之仁能以臣血濺丹墀則可舉朝忿忿皆言若之仁殺饒司直反耳何名義師之仁亦迫於大義而止丙戌三月十九日思宗大祥廷議寂然慕志守諭乃上疏曰臣聞忠孝節義由於朝廷之激厲濡忍偷安由於志氣之卑昏故舉一事而能令臣民上下有悲憤振肅之狀動一念而能令天地祖宗有式靈感格之忱萃渙合離全藉此道設人主於終天大恨置之若遺履之若忘則士氣不作士氣不作則

兵氣不揚無論無以恢復亦無以立國也臣痛憶先帝
焦勞十七載無一日不思治求賢無一日不籌兵辦寇
奈庸臣誤國頓遭千古未有之慘凡有血性忍忘先帝
身殉社稷之烈乎臣去年窮居值此時日北望一哭幾
絕痛恨南都臣子若遺若忘何怪忠孝節義掃地殆盡
也今臣覩顏邵曹皆先帝培養之餘澤驚心歲月當遺
弓抱恨之春秋遊魂未返陵寢安存真一回思之一斷
腸矣宋高宗每正月朔日率百官遙拜二帝不受朝賀
今主上仁孝性成百倍高宗刻刻不忘報仇則刻刻不

忘先帝刻刻不忘恢復則刻刻不忘三月十九日今年
是日卽魯監國元年追思泣血之首一日也臣請躬率
臣民徧諭各藩軍士縞素哭祭每歲定以爲制使人人
切齒怒號庶君父大倫從此振起然後昊穹悔禍神人
其助報不其戴天之仇而建中興復古之烈也王著禮
部傳示速爲舉行甬東正氣集杭人陸培王道焜並殉節廷
議賜諡不及道焜守諭爭曰兩人同死何由分其優劣
豈以道焜非進士乎今進士而賣國者累累也道焜乃
得諡節愍王累欲遷守諭官而難於代者命兼經筵日

講江東內附墓志守諭遂行遯江潯朝夕涕洟有慰之者

輒告之曰吾不能與汪長源陳木叔同逝尙何顏立人

世其爲詩歌徧哭所知之死國者淋漓悲悽令人不能

自勝是時海上未靖柳車從亡日在島嶼之間守諭不

惜傾家助之以是盡落其所有續耆舊傳一日翁洲破相國

張肯堂之孫俘入欲還里無有爲之保者守諭曰此吾

事也入言於監司守諭之干涉當道者惟此而已墓志晚

年困守一廬苦心易學聚古今言易數十家攷其異同

有得卽鈔之積以成帙曹志甲辰卒年六十九縣令張幼

學赴弔歎曰名可得聞身不可得見也

續資子道權謹
舊傳據

鄞縣志補

王正中字仲撝直隸保定人登丁丑進士第未謁選索
游於高唐州守以爲銀杠旦晚是敵物不如以此鬻城
免士女屠戮流離之苦立要約使與議者押字仲撝與
焉事平轉運者上失物狀於是逮高唐守及仲撝論死
繫獄數年刑科給事中李靖理而出之降補揚州照磨
移知長興縣國變後失官避地於紹興截江時以兵部
職方司主事攝餘姚縣事是時公私赤立剽奪爲豪市

魁里正朝得劄付一紙暮便入民舍根括金帛係僇丁壯郡縣不敢向問爲某營也仲撝設兵彈壓各營取餽必使經由於縣品覈資產裁量以應之非是則爲盜賊總兵陳梧敗於樵李渡海至姚鹵掠鄉聚仲撝遣兵擊之鄉聚相犄角殺梧行在忌仲撝者以此聲討黃宗羲上疏救之乃止張國柱劫定海列船江上入城牢搜者二千人仲撝攔止國柱終不得志而去田仰荆本徹先後過姚皆帖帖俯首不驚雞犬陞監察御史尙寶寺卿朱大定太僕寺卿陳潛夫兵部主事吳乃武皆從浙西

來受約束伸擣短小精悍好讀實用之書其言星象則從閩人柯仲炯於獄中受之行在初建進宗羲所著監國魯元年大統曆又累受宗羲所註授時曆及律呂壬遁皆能有所發明丁未八月十九日卒年六十九權厝於山陰之陳常堰所著周易註若干卷律書詳註一卷

子三捷

謹据黃宗羲撰墓表補

章正宸字羽侯會稽人從學同里劉宗周有學行舉崇禎四年進士由庶吉士改禮科給事中疏請帝法周孔仁義黜管商富強則太平可坐致報聞禮部侍郎王應

熊者溫體仁私人也廷推閣臣望輕不得與帝特命入
閣輔政正宸上言應熊見擯廷推何緣特簡今事因多
擾變以刻成綜核傷察宜存渾厚奈何復使很傲之人
與贊平明之治哉因力詆其很籍封靡請寢前命帝大
怒下獄拷訊御史米助國金光辰龔廷獻給事中范淑
泰吳麟徵傅朝佑論救皆不聽竟削籍歸九年冬有詔
起廢召爲戶科給事中正宸因言起廢旨屢下而與臣
同列名若詞臣劉必達楊世芳等已死乞敕所司速舉
帝納之藥廠災壞公私廬舍無算正宸言火於五德爲

禮禮教不修火災乃見陛下臨御初未以沽名市德疑大臣頃大臣救鄭三俊錢謙益忽爲是言是一無禮也史莖下吏疏辨抵稱時局思籍眾口又一無禮也朝廷每一番令甲輒增一番私營如吏部郎張樉芳以不謹被黜巧借城工復職非陳啟新任怨鈔參則考功之法可以金錢贖矣又一無禮也災異頻仍聖心憂憫而戶部主事李鳳鳴謂善言不可退災星亦一無禮也帝是其言時廠衛務羅織人罪而巡撫武弁從而效之正宸言京師死刑視四方獨多其處決視四方又獨速請申

飭廠衛巡捕官帝令司巡捕者回奏氣勢稍衰十四年
屢遷吏科都給事中周延儒再相中外仰望丰采而門
多雜賓正宸其門生也獨不肯附會十五年正旦朝會
帝進延儒等揖之待以師傅禮正宸因言陛下隆禮閣
臣閣臣宜積誠以格君心不與中官作緣不憑恩怨起
見不以寵利居成功不以爵祿私親暱語皆風延儒及
宣大缺總督延儒欲用宣府巡撫江禹緒正宸持不可
吏部希延儒指用之正宸復劾其行賄事帝不納延儒
欲起江陵知縣史調元正宸止之延儒再召頗得馮銓

力欲以守涿功復其冠帶正宸與金光辰力爭事遂寢
尋詆兵部尙書陳新甲奸邪薦李繼貞李邦華史可法
孫傳庭可代及松山師覆請先正中樞破壞之律然後
正行閒失陷之條新甲遂獲罪旣而會推閣臣失帝意
謫戍均州福王立召復故官疏請亟檄四鎮分渡河淮
與江北山東協力互爲聲援且請縞素率師駐蹕淮上
時不能用內傳用張有譽爲戶部尙書正宸以有譽雖
有望而中旨不宜出抗疏力爭有譽卒以廷推用魏國
公徐宏基等公疏薦張捷命下部議并議前戶部主事

鄒之麟前御史張孫振劉光斗起用正宸分別論諸人
稍寬捷而力詆之麟孫振光斗馬士英不悅擬諭詰責
回奏上獲免尋以安遠侯柳祚昌薦起用阮大鍼正宸
又力爭且曰朝廷如此舉動邸報流傳見臣姓名尙挂
仕版必相顧駭愕謂負掖垣職掌萬死何辭乞先放臣
歸里士英輩忌正宸居言路遂用爲大理寺丞已見國
事曰非請假歸魯王監國起吏部左侍郎不受仍署舊
官事敗棄家爲僧不知所之

謹据王鴻緒
撰明史彙補

朱之瑜字楚嶼至海外復字魯嶼又號舜水餘姚人少

一系
仇爽有志概有持譜獻者謂朱文公子爲餘姚令家於
此族人欲附之之瑜曰中有一世訛脫卽難徵信且人
貴自立不必攀附紫陽也寄籍松江成諸生提學御史
元某以才備文武上諸禮部癸未甲申兩奉徵辟明社
旣屋福王建號江南總兵方國安薦授江西按察副使
兼兵部職方司郎中監國安軍馬士英方用事遣私人
周某偕同邑何進士東平招之之瑜念方馬終誤大計
力辭臺省劾偃蹇不奉詔將逮捕會南都亡遂解黃斌
卿奉表閩中勸進唐王加斌卿肅虜伯鎮舟山之瑜往

依焉於斌卿強悍不法數有所救正承制授昌國知縣
又表授監察御史管理屯田事務聘軍前贊畫均不應
御史馮京第之自湖州軍破也間關入四明王職方翊
軍中時內地單弱欲藉海外之師爲響應京第勸斌卿
乞師日本斌卿因命弟孝卿副京第往之瑜從之撒斯
瑪王許發罪人三千及洪武錢數十萬京第先歸之瑜
留而師不果出己丑魯王駐舟山安洋將軍劉世勳疏
薦監紀推官吏部擬兵科給事中改吏科時禮部尙書
吳鍾繼扈王兼督學政以開國第一人薦將授翰林院

官先後力辭王翊之朝王也見之瑜恨晚舉孝廉辭辛卯舟山陷飄泊海島轉徙日本交趾暹羅開甲午徵還敕書達交趾焚香開讀東望涕零戊戌赴廈門朝王不果己亥朝王金門時朱成功張煌言會師入長江之瑜主建威伯馬信營信台州副將降於張名振者也名振死以兵屬成功與忠靖伯陳煇之瑜常往來兩軍間克瓜州下鎮江皆親歷行陣未幾事敗益徬徨無所向返日本日本人安東守約周給之丁未水戶藩侯源光國爲築第駒籠別莊造膝訪道東國未有學著學宮圖說

依以創造凡古升古尺簠豆籩鉶之屬咸備又命俊秀子弟從受釋奠禮已酉年七十辭歸不聽饗之後樂園以屏風爲壽繪東國及中華耆德六人則武內宿禰藤原在衡藤原俊成太公望桓榮文彥博也已未年八十致祝如初壬戌四月十七日卒年八十三光國遣世子綱條臨喪葬常陸久慈郡大田鄉瑞龍山諡曰文恭構祠堂駒籠川莊親製文誄之之瑜生八歲而孤伯兄啟明天啟乙丑武進士南京神武營總兵都督同知以忤閹削職特旨昭雪授漕運總督國變未赴任行由總兵

効歸國朝強起之不可後以老壽卒仲兄之瑾諸生弱冠卽天之瑜在日本苦蚊有勸幃以紗廚者謝曰先世葬域兵後恐遭蹂躪輾轉思維不敢身處安逸耳凡中華人來必泣問伯兄近狀娶葉氏生子元模元楷繼娶陳氏生女高字柔端元模屢省父交趾廈門辛丑歿於海外元楷隱居教授己酉卒柔端六歲喪母年十二遭世亂卽佩刃自防字何東平子鬱鬱未嫁而亡之瑜篤於友誼初以詩受知於張國維朝列相知者陳函輝張肯堂同縣則鄒元寶斗東葉大受陳遵之族子錦尤與

王翊吳鍾繼朱永祐契之瑜之返日本也諸將留之張
煌言挽之尤力之瑜以海濱無田可耕坐而糜餉有負
本志遂行初交趾王檄取通曉中華文字者被擣至不
拜王怒錮禁之繼知不可屈遺書有太公佐周而周王
陳平在漢而漢興語答曰天禍明室不佞逃遁貴邦苟
全性命如欲委質他國皇天后土實鑒此心儻異日者
瑜藉大王之靈逆歸桑梓當舉貴國擣貳之端昌言於
朝使聖主明見萬里貴國得世守藩維歲貢終王寧不
賢於瑜之竭蹶貴邦哉乃縱之歸之瑜問學賅博少從

業慈谿李契元有詩數十篇附刻姚江詩存文集二十
八卷皆海外所作日本正德二年源綱條刻之有安東

守約序日本高弟有守約子安積覺又令井將興

謹据
朱衍

緒家
傳補

海東逸史卷之十八